



新刻石室先生丹淵集卷二十九

宋尚書司封員外郎充秘閣校理新知湖州軍州
事兼管內勸農事上輕車都尉文同著

啟

謝吳龍圖啟

某啟近者伏蒙知府龍圖諫議爲某發章薦於朝廷
乞召還書殿以備諮訪者聞命彷徨撫躬戰慄伏念
某材惟朽下性實朽疏稟之自然確不能變然而纔
於爲學之始便識立身之端唾詈諂憎惡詭激惟

嗜古人曰仁義者飾諸已不隨世俗謂富貴者移于
心所以自從登科已至游宦二紀於此一節不回雖
然官升朝省久軋而難遷職隸館閣一置而不問中
間累經患難固亦自安困窮私念既無援助於當途
常謂莫如退縮於散地向竊請郡聊圖庇身豈謂孤
迹之有依獲在穠陰之所覆每自戒飭庶逃譏訶伏
惟某官學洞聖賢之深器懷公相之重臺諫風采至
今凜然藩鎮威名所治肅若其如好引後輩曲揚小
才忘長醜於流離采下體於封菲謂某自登門館已
歷歲時知其亡它憐以甚憊今茲守土復在提封考

其効官之方參以行已之事雖亡善狀可免嚴科遂
抗薦章特形褒語蒙見輓之若是在論酬而謂何謹
當愈勵清修益勤素行所貴異日獲在洪鈞之前不
後它人亦預巧陶之未過此以往未知所裁謹奉啟
謝不宣謹啟

謝運判韓都官啟

某啟近者伏承某官特爲某發狀保薦聞於朝廷者
反視諸已止如常人念無它才取重賢者聞命之始
撫躬若驚竊念某本出孤寒素無才譽自常審已不
敢求人獨於執事之門闌向在京師而出入所以南

陽丞相嘗爲發章北門主人久與同事至蒙存錄尤
恤單平豈期今守於偏州復幸託居於大庇蓋藏其
短已荷殊恩升薦於朝甚出過望何於已而萬幸惟
受眷於一門感發于中言出不妄止勤薄効上答深
知謹奉啟謝不宣謹啟

謝運使韓少卿啟

某啟近者伏承運使少卿發狀論薦乞朝廷召某任
使者顧此無狀聞之若驚將何官爲可用報稱伏念
某本無藝業偶竊科名復幸散材更塵文苑稟資鈍
縵臨事迂踈用旣無堪援亦甚寡然而耻謀優佚願

試繁難向請外官蒙除此郡政多廢墮事徂因循凡
謂網條諸無件目加以地產豐夥俗習僭豪疆戾相
高孤弱無告某止能爲明枉直聊正典章惟存至誠
豈有它術伏遇運使少卿選從中嚴委付外臺旌別
羣僚臨按一道猥收蒙鄙曲爲薦揚取困轅間奪燹
竈下施之寶校飾以珍徽俾騰長途使備雅樂存憐
若此感激無涯惟務操修庶酬知遇卑情無任佩荷
深切之至謹奉啟稱謝不宣謹啟

謝成都知府啟

某啟解麾漢水之陽愧無善狀剖竹洋川之上重沐

殊恩退惟謏薄之姿薦託醇醲之蔭已頒條教謹佩
歲規切念某性本推儲學無根據誤中太常之異等
獲陪秘府之英游然而蹤跡甚孤媒援絕寡常務以
繩墨而勵已豈暇學脂膏而事人衆皆憐之盡謂其
不肖獨無愧者自知其當然況其幸之已多於所請
而常得矧茲刺史之職任實曰難才惟是上官之保
存方能免過此者伏遇某官以高才奧學而陞法從
以竒謀妙略而居要權總鈐兩道之兵符提按諸城
之吏瑣向嘗備吏已荷庇饒今復爲州又煩提教屬
守符之所系伏賓庇以無由跂引崇嚴下情無任喜

懼交集之極謹奉啟謝不宣謹啟

謝中書啟

某啓郡易其名罷當還館詔命所表許復爲州從人
欲之便安何君恩之寬大重煩宰制竊負兢榮某已
於三月二十八日到任上訖伏念某門地至寒資材
甚淺宦途最品儒館陳人學每強而不高命初稟而
且薄從仕二紀罹憂百端居嘗自知分蓋如此鄉因
乞守於鄉近曾未滿期而地遷旣屬減休之員實虞
轉徙之患遂陳悃悞仰竄朝廷敢期下貸徵求再蒙
寵寄此蓋伏遇某官以經術講大政以器識觀羣材

輯和衆功製治元化所以陶鈞之下無坯堞之差夫
墨之前盡輪轅之適用巧所及雖微必收故茲辱庸
亦被掄委敢不飲食王事寤寐政經對諸吏民之言
諭以君相之意凡云釐政止在矜寬庶知爲國之仁
少報代天之惠某無任感荷激切之至謹奉啓謝不
宣謹啓

謝文潞公啓

某頓首上季夏極熱伏惟樞密太師侍中台候萬福
同遠離門館茲已逾年想望恩闕豈忘寢寐自顧寒
賤之品不敢非時奏記貴平掌縣今到州伏蒙侍中

存錄孤生特頒手誨丁寧告諭若語子姓奔騰浩蕩
揮灑累幅開緘之初勢欲飛騰伏誦數過暖如布帛
出詫僚友盡恨不爲已物歸示妻孥皆云便是家寶
台躔引照薊室生輝昔人有受細林之言而退書諸
紳獲山陰之字而別爲一袞豈與不肖今日所得相
比擬哉佩服嘉貺榮望已足珠璣滿斗實輕此惠永
言藏去以傳世衍同無任忭蹈激切之至謹奉啓謝
不宣謹啓

別紙

某出入門下殆三十年賦命薄淺牽挽不上侍中每

於孤蹇顧遇不替凡列左右温慰如一同所恨窘迫
急於救贖不得若官筆下
日趨思屏得即於此至焉牢落山谷之中殊無氣味飲食之物藥
劑之品悉仰它處遠不能得已過五十漸入衰病生
平苦學自知無用閑方僻所且冒祿食實亦自愧矣
侍中常賜存卹敢此具道某上覆

謝王尚書啓

某啓某近至幕府少謝尚書爲辦東行之惠以某之
散冗以尚書之貴重其謁見接遇之禮止當一賜之
坐一召之食則其禮宜矣而尚書厚自損抑絕去崖
岸延引勞問言貌温悅遊騎燕席皆許參侍有所過

慢一用恕悉此尚書立德之隆取義之重爲之而可
也其如某之負抱靜無所有使之將何以報尚書如
是存眷者耶某此者幸得試職文館尚書將旦夕召
用歌勲頌業燁耀尚書之休懿者某僅能爲之是亦
可以對今日所蒙之萬分爾漸遠軒屏某無任瞻系
激切之至謹奉啓謝干浼威重伏增恐慄不宣謹啓
謝提刑謝司封啓

某啓某近者竊聞某官以某備吏於所部之下怜其
亡狀之迹不能激昂奮迅自求所以比數於人亦已
久矣故深欲車推而綆汲之使不至留礙沈溺乃持

其姓名覬有聞於朝廷之上而且謂其亦可以施用於當時者其蒙德之厚將何所有以謝公如此之貺於門下者哉其不勝喜懼交集彷徨展轉之至伏念其出於孤賤資品殆不能及於中人學進士本無望遂至於顯榮止欲求升斗之粟尺寸之帛以免夫終歲饑寒之患不幸天與之性使之簡介而專僻於人事殊不通曉常自顧其中枵然無它竒方以求知於人歛嘿羞畏固未嘗敢輒一開口問寵官要人丐少餘論執之以為進取之階從讀書應舉及第守官以至遷改資序召試貼職皆以在上者之人見愛謂其

所行道途後日當必至其所至之地乃相與極力牽挽僅能致如此之今日雖然所獲能幾而已似夫不可當得十年之中罹禍難被困苦蓋濱於顛隕履踏之危者實屢矣昨蒙除恩粗得試守此郡正謂居明公提按之下殊不敢儕於隸人有斯須自便之懈循大端略冗目擊豪暴撫柔良如是焉而已矣且欲免在賢人君子之側不使少有罷輒不識之過以取煩於芘賴或至於不可留以為民之師帥又懼取煩於啓上而斥去之豈謂某官以恢博之量通察之明訾相官屬內辨良苦必以某底裏推縵甘守頑藐偃然

自治以安不肖垂哀下閔將洒濯而熏被之使焯然
發光焰出文采從學士大大之後無或少愧某被賜
厚矣言之無由以殫其感之心矣其如所以日念報
稱於左右者惟當飭羈勒駮鑪轡施鞭策就康痊而
以事夫駸上不已者焉有阻趨瞻實增戀慕謹具啓
謝謹啓

謝張度支啓

某啓近者伏承某官遠馳輜軒下歷敝邑傾望之始
人皆憚於嚴明按視以來衆盡蒙於寬假官吏識提
綱之體兵民忘持斧之疑才賢所臨風誼斯在竊惟

布郡國之政皆以分朝廷之憂然於察廉必用照恕
有智力雖短而顧無會冒之惡有措置或爽而能盡
公忠之心至如決罰微涉於笞杖之差區撥略失於
關移之緩整比未稱占對稍愆此乃衆人常情庶事
末節若次第皆指以爲罪則煩碎下無其所安須存
其權使盡乃術伏惟某官治已以禮示人不疑通達
以該乎物情文雅以飾乎吏事凡閱諸目止求大端
但觀爲治者何如其人曾莫更問其至小之過深副
上詔大權羣心某退自省循實蒙存錄惟堅其守用
塞所知卑情無任感忭激切之至謹奉啓謝不宣謹

啓

謝張提刑啓

某啓近者伏審提刑卽中不以某無狀特論薦於朝廷者承命悚愧處之不遑竊念某生於遠方世事畎畝稟賦不厚諸無所長只好讀書幸輒登第間關二紀患難百端雖通籍朝闈隸名儒館而自顧不肖常甘退藏向得此州實滿素望驅勤飾拙僅以逾年至於簿書紛叢獄岸煩瑣丁寧區撥駝曲辨明推屈姦頑撫字惇弱未嘗一日敢懈於公謀免過尤恐負除委心勞如此才短柰何豈無不然上達有位伏惟提刑卽中取人無備接下以寬不職之愆過蒙覆護非次之舉復爲翦揚荷所眷存敢忘報稱惟期勉懋用答獎知限守麾符阻多墻闕某無任感佩慚忭激切之至謹奉啓謝不宣謹啓

謝田京待制啓

某啓昨侍燕坐親承誨言心相矜存意在推挽荷德之重撫躬而榮竊念某稟生甚微爲學差晚勉道不至強文非高偶塵賢科遂去民籍一命佐府止安勤愚三年歸銓幸免愆曠比調藩候之幕獲依臺使之麻赴官未期託跡于是此者伏遇都運待制持斧按

部驅車過州例叅羣名進拜崇采接以溫裕已被寵
華之深憐其單平復形恩意之厚退念所守何堪其
承再惟頡蒙本喜論譔公有奇節時方盛傳止能
竭豎儒章句之微據賢者忠義之實會以逸事張之
累篇或播之於樂工或附之於史氏歷世茲永大名
其新惟持此懷庶答乃惠

謝都運傅諫議啓

某啓伏蒙聖恩授前件官已於去年十二月二十九
日赴上訖莫府承察已編吏瑣嚴臺取庇謹佩官箴
省已朽孱側身悚覲伏念某處地遐絕託宗衰寒易

業耘芟嚮術鉛槧專尚以學妄追原法偶程其文謬
玷科選旣策足以從仕遂刻心而首八願殫勤愚儻
稱恩遇向宦西轡幸逃過尤此官南小誓謹名節然
而賦守推滯云爲拙蒙深繫賢明大由寬假伏遇某
官德厚而載才高且通接物於誠待人以恕西道籍
用簡君相之愛列城承流聳士民之望某幸以眇迹
遙于洪庥常祈台光有照隙漏止營寸効仰報全仁
某無任喜懼激切之至謹具啓謝與犯崇重伏增戰
越不宣謹啓

轉官啓

某啓考績中臺叨奏成於吏効引名便殿獲序進於
朝倫服寵命以優榮揆孤衷而悚越切原夫歷代之
典最重者太常之司有虞之隆兼禮樂者秩宗之任
惟周之盛次天地者春官之聯其後取名各殊定品
允貴於以表國家盛大之義謂其練朝廷沿革之文
旣爲之卿也總正其端原又設之丞也欣助其區處
苟非達聖作明述之奧辨功成治定之宜識無不通
才有可議則何以槩隸此局濫塵厥官就失慎於
選掄是輕蒙於稱誦如某者出在遠蜀生於窮閭自
曾高已還而未嘗服官因文物之盛而輒自嚮學性

難挾以非穎文支離而不工偶叨薦書獲寘仕版贊
佐兩郡周回十年上官交章謂其可以任使本部按
召乃曰當乎叙遷有持所得之科名爲引久待之恩
例銓啓上列宸音下俞超居衆前使異平選逮趨雲
陛之對親邇天言之臨錫之恩章命以通籍乃署此
職以榮其躬何不肖之賤生受常存之要秩迺幸孰
與其緣有來此蓋伏遇某官平誠接人用恕及物凡
在顧矚悉生輝華剔鏤朽液而冀成美材鎔鑠堅頑
而使就利器茲所蒙被實由剪揚退惟孱冥粗識依
嚮某敢不夙夜自敕起居弗寧率道而行徇公以處

貴少取於治最勉後報於恩仁心所記藏書烏簡扁
卑情無任感荷激切之至謹奉啓謝不宣謹啓

上知府吳龍圖啓

某啓仲夏毒熱伏惟某官尊體動止萬福即日某蒙
恩伏念某遠去左右倏焉三月嚮慕旌榮發於夢寐
候問之簡念常愧仄竄謂明公愛恕臨下復煩寵答
所以用此有如惰畧仰計崇量曾莫垂責伏惟鎮撫
方面安靜如堵暘雨時節稼穡登楙善良申展姦豪
屏縮治蜀之績轉聞久矣惟虞鼎席之缺即下鋒車
之召西南民吏求借不得某出入門下十年於此被

顧良厚實越倫輩今復試守支郡獲依使芘蒙賴台
照日晞光燄敢不夙夜思懋厥職上報大君之殊惠
次酬明公之優眷符守所拘阻趨嚴屏乞上爲宗社
精調寢餼某卑情無任系戀之至謹奉啓上問台候
不宣謹啓

賀昭文文相公啓

某此者伏審昭文相公寵被明詔召還宰席朝野之
士揖拜相賀誠以相公器度識畧實冠流品洞明前
世經權之會探究當今治忽之體用之於文則脩舊
起廢而倫理備施之於武則翦暴除亂而姦宄息有

惠利以浹民之骨髓有勲烈以載國之旂常窮涯缺
隅孰不瞻系而一旦在外頻年不歸雖有美化止及
乎一方實使重望久虛於四海皇上懷眷舊德企渴
嘉論亟下宸旨以促其入追復正治易如指顧方今
四夷未甚率服百姓未甚富庶陰陽未甚調泰稼穡
未甚蕃衍相公登庸羣議欣洽感動和氣煙霏雲浮
熏烝悠颺疵癘皆愈太平之遇期在旦夕天下幸甚
某早荷存顧無所報効側聞休命跳地而舞伏限官
守所拘不獲奔詣左右某無任喜躍之至謹奉啟賀
不宣謹啟

獻文字啟

某啟恭荒閣鈍叨幸庇迹於麾下以某嘗用文字進
取科級以某官有重名于當世復仗使節臨按其上
固宜整緝舊學蚤先諸人以獻左右為下吏導名姓
于上官之禮然猶省慮忖審歆往而復卻者二年於
茲矣無他實謂本期用此以來一顧之惠或懼惡其
蕪雜蓄亂聽覽反獲投棄之辱職是故嘿然者久焉
今歲官滿有旨召試在函蒙蔭局事甚簡時亦強自
搜剔營新補故聯比綴次以備其事雖日無取詎敢
藏匿今輒繕寫古今雜著共二編上塵台几裁制之

睨顧賜披閱可進可止唯俟嚴教干况威重無任戰
慄之極不宣謹啟

新刻石室先生丹淵集第三十卷

文同著

啟

謝趙龍圖舉自代

右某啟近見本州進秦官報狀竊承知在龍圖舉某
自代者心隨驚飛汗與愧落自己不稱人其謂何伏
念某氣識甚蒙材品至下毓質僻陋逢辰盛明起地
讀書變家登第袞袞從宦斤斤勵躬唯循廉隅敢越
涯分進隸儒館蓋緣科名累遷卽曹實用恩例曾不
僥競重防詆訶高尋前入下遠浮俗半通五兩滄每
自安數粒一枝居無別望幸官鄉郡竊訖使麾事親

之心大恐不至好古之道深虞未淳豈謂某官愛其所存忘是不肖因遷美秩遂啟中宸謂某竭力慈闈行著鄉里玩心聖壺譽高儕流退謂不如引而自代某愚何者公意乃然大雅所爲固云謙抑小人當是不能不悚兢念蒙此章將底云報唯當益謹素節上酬深知限守詔條阻趨麾戟引領門下無任感佩激切之至

謝館職

伏蒙聖恩授充前件職者程文禁林幸被詔寵列職秘館謬叨恩榮度裏榻屣撫已慙懼伏念某出自遠

蜀生於窮閭逢時之文從事於學性自鄙樸才非淹長吟磨簡編力不逮古撰綴辭語強無由高名聞寂寥跡緒竒蹇退守舊業田園皆荒進於榮途道地愈遠嚮繇選藝閭里偶塵薦書外名殿廷誤中科級是後更佐兩郡行周十年近緣公章入改朝序尚茲僭妄敢爾僥希攀援前人引列著令愚悃上達宸音下俞委之者儒較以舊學並取者衆獨知寂艱洎試淵題加多穴思小巫未進靈氣已銷大匠在前汗顏不止飛景將入蕪音僅成機杼不工痕疵固滿猥當奏覽常待報聞敢期清流亦用微品竊謂圖書之府英

雋所躔亡似而居有覲其面靜惟之致良有所階此
蓋伏遇某官獎育微才推揚介善言辨臧否人爲重
輕眷茲單平陰所提振是致懦品亦升華階惟精乃
心以辦厥職庶酬已目無玷恩陶卑情無任感荷激
切之至

謝提刑度支

近見本州進奏官報狀伏蒙提刑度支舉某不次擢
用者無狀之人本自甘于散外不訾之舉期特畀於
褒陞被眷優隆省衷愧負伏念某生地至遠如人且
微起家學文擢第從政殊無才術之可用但守勤愚

而自將圖書之淵謬陪於俊茂禮樂之府竊玷於班
聯居常懷慙敢自謀進嚮以親闈之便得茲鄉郡之
歸職事沈迷廩食尸素幸諸公之在上顧匪人而若
有無責其瘼重爲之地此者豈謂某官大與范賴陰
相薦論謂宜召還不次擢用施此眄睐屬之孱庸慮
聞于他或議其過斯蓋某官常賜延納屢交語言察
某之性椎鈍而少文揆某之心歛默而畏動持此之
見抗然以言况如某之所爲實在時而不肖既不能
激昂以取夫榮耀又不能潛伏以休於幽涂徒容其
身以累於世然而伯陽所尚者知止仲尼之與者有

常仰惟高明用此采錄敢不益敦素節勉尚清脩惟
堅所為以俟其報

謝運判舉陞陟

伏審運判職方同罪保舉某不次陞擢者聞命之初
撫躬而愧竊念某生無肖似起自單平偶然讀書遂
爾登第止知公忠清慎曰涖官之本不能矯曲儉媚
効隨時之為用諸公之薦而升朝闈蒙先帝之召而
入文館常淡厥進以安其愚兢兢自持默默無競向
求鄉郡視履親闈得此公麻已深天幸運判職方一
見如舊二年於茲故常掩覆其不能未始督責其無

狀已荷寬假敢期薦論茲佩德之至深復何言而可
謝唯將愚節上答已知卑情無任云云

謝成都府尹并三司因權邛州

近奉臺移俾承郡乏已茲涖政常爾兢兢懷伏念某學
術非深才具至短其資選懦所向拙方為治中之官
殊恐不職行太守之事固非其宜然而一紀之中三
來於此事體素習民情相諳雖若偶人之臨猶為編
戶之信止循舊貫敢立竒名但勤學製之工庶免代
傷之醜惟煩厚庇以保孤蹤引企門闌某無任系恋
謝府尹并二司因磨勘交子

嚮者領帥府之詔置校財簿之虛盈留連幕中將逮
一暮之端出入門下何嘗三日之踈威采霽上官之
嚴文儀簡屬吏之禮曾無督責常與撫存凡燕游之
地許其來從有詞章之事多以見屬仰被慰錄他無
間言某自知非木石之頑公垂眷有丘山之重事已
還治心焉嚮仁前此違離實深感愴此蓋某官神襟
浩粹德量濔宏扶持草茅毀去崖岸周旋接下不以
勢力而自高款曲推誠蓋存信厚以相待遂使庸妄
居嘗傾依里堠裁一昔之行門闌若千里之邈惟勤
職業以答愛忘更伏在秋嚴漸邇伏乞上為宗社精

瞻晤徒切傾依謹奉狀賀兼謝謹錄狀上

謝成都端明因上任

蒙恩授上件差遣已於今月日赴上訖親老切於侍
膳累求便官君恩許其還鄉得佐支郡茲服嚴命已
臨賤司伏念某生也至孱學焉甚陋偶時之盛從事
以文謬緣賢科竊迹秘府嚮嘗遂外官之請尋用持
先子之憂一居家山四改歲序有母八十重遠於慈
闈去國三千難歸於儒館敢圖就養輒以抗聞人賤
言微天高聽邈中旨敦迫群章薦論既而還臺復爾
叩閣屬聖君之孝治體人子之勤誠會此空官俾之

承乏今侍親輿之至即書吏版之中伏遇某官德量粹淵端誠愛恕秉持重節攷按諸城退省儒庸實繫芘賴唯全素守以追嚴訶

謝主簿任通夫

伏審向者召以一封之車試於四禁之地蔚矣奏成篇之上霽焉蒙躡渥之榮光輝朝廷聳動鄉里伏惟某官詞章豪蕩學術深明久馳不偶之稱忽應特招之選果升宦牒甚慰輿情不遺撲鄙之微先賜緘膺之重私心至喜厚意難忘

謝移厨三本

風微自益景慕向題輿之道此獲欵板以拜前傾聞話言慰滿志願邇涓辰而署職先屈禮以飛文過爲謙冲重俾慚慄恭以通判屯田履尚端潔襟期粹和待人以誠納已於道居贊貳之秩尚鬱於美才用薦論之章卽陞於清貫其所系賤局甚遙高軒深希保調用對旌寵卑情無任企望之至

謝夏宮苑

右某伏審顯奉宸綸榮持郡節凡叨巨蔭舉集驩悰恭惟知府宮苑太博世襲公忠天資毅勇才明以斷德厚而溫屢更軍律之雄進領使權之重時惟景服

上所眷求護苑丘之兵已聞寂入布函國之政實自
選行茲承治裝匪遠戒道同幸以蒙悞獲居庇存瞻
趨有期企聳以俟某無任系望欣躍激切之至

謝三泉知縣贄善狀

右某此者祇膺朝檢移領郡章已試薄才輒臨庶務
方馳誠而徃謝忽遣介以見存伏惟某官出忠孝之
家稟禮義之教夙成懿德休有令名尚縮邑符固淹
輿論下眷僻藩之守特脩鄰土之歡佩荷惟深紀銘
曷盡謹表狀謝

謝諸郡

右某忝奉邦恩俾臨郡治消辰以吉視事云初退省
已以無堪實懷慙而甚厚心之所恃賢者相依幸託
庇於鄰城敢晞風於懿範某官志勤育德義切成人
儻拙政之有聞願美言而見教感所磨礪存諸鏤銘
尚遠瞻趨徒深跂引

謝韓少卿

伏審榮奉制音寵移漕命郡縣聞此吏民驩然恭惟
慶慰伏以運使少卿性稟淳明才周敏給自歷揚於
美仕皆夙著於休庸有忠績上簡於帝心有惠術下
克於民望蜀之列部大半被於矜存邦之要權未幾

聞於召用西南爲地漕運須人豈無餘散之未安即
見良謀之盡講某猥臨支郡託在洪庥雖勉居於千
里之封實徼幸於二天之庇限居守印阻謁使旌引
望車塵敢通郵訊云云

回蜀州王郎中

親老待養求侍於慈闈君仁推恩許臨於鄉郡至官
以近屬事之叢常欲爲諸公之書謝所不逮卒未有
少時之暇致之無由靜念稽遠深懷悚戢敢期存盛
之厚特徃封騰之先乃眷甚隆其謙益至伏惟某官
全守正重端持公忠自歷榮涂皆揚顯譽而能敦獎
士之節厲樂人之風雖此么孱亦蒙顧與布詞以麗
將意其勤荷德殊優爲顏已厚正嬰官守之冗阻奉
賓從之遊引首使麾無任企向云

回嘉守楊郎中

向者某官持節爲州驅車過郡獲瞻符采甚慰久傾
之勤款奉燕談益資寡見之陋遽爾去德缺然爲書
視禮之踈撫躬而愧邇承撰日榮此臨官將効馳誠
先蒙賜教厚自降接雅存謙尊某官冲量粹温令猷
淹茂文章貴係簪組名家茲假長才屈爲遠守方成
踰月之政已布載涂之謠伏冀勉輔生經寵綏多福

回郭國博德容啟

伏審被中宸之恩進上庠之秩聞命將慶貽書忽先
蒙禮見存揆衷且愧某官稟才端厚挺質粹溫早歷
榮階沛著休績茲膺帝渥實獎年勞未獲瞻依豈勝
係戀

回彭守鮑郎中啟

伏審某官被命作藩涓辰視事將馳慶幅先墜華函
雅意謙冲鄙懷慚懼某官寬裕宏偉端方勁嚴蚤著
殊能薦揚膺仕惟天彭之占郡乃并絡之名區民俗
淳和壤土饒沃訴訟甚簡幾至於鞠靡教化易行豈
煩於餘刃將疇善課即見褒遷咫尺墻折睽遠風度
敢祈葆毓以慰傾瞻

回茂州吳郎中啟 邛州

聞風舊矣奏記缺然嚮服才猷徒傾於翹館輸馳懇
素莫置於行郵使由奧屏之來惠有榮函之及布詞
且麗將意甚勤某官學有本元術兼權立向繇劇邑
選委遐藩蓋憑綏輯之才果布循良之政即程懿績
就服褒恩某仰德雖深蒞官有制未許會晤嘗積瞻
凝

新刻石室先生丹洲集第三十一卷

文同著

謝提刑張郎中

伏審提刑郎中奉被榮恩按平祥憲西南列部上下
交懽伏惟某官器度淹閱資猷敏給奧學洞羣經之
本高才通庶政之宜家傳文章世仰方格豈獨推於
人望固自結於主知朝廷之慮者實在乎遠方郡縣
之失者恐失乎中典當從謙正乃屬賢明嘉命初聞
輿情已愜某幸茲守郡獲在提封顧最陋之微材託
均穠之厚蔭限拘左印阻詣前旌

謝韓運判

右某近蒙高軒遠按下郡地既辟陋事皆因循某向此臨邛比裁閱月雖嘗整輯尚未安完以至簿書迷甲癸之行倉庾亂新陳之次運判都官持心近厚垂意見存和顏相臨溫語下逮譏訶免於羣掾鼓扑違於諸胥重煩文移勤與教示某乍茲試守竊已蒙休始常懷罷輒之虞終實荷蓋瘕之賜感銘斯極跬履無忘

謝提刑張郎中復官

右某近服新恩再居舊秩曲臺議禮既失於討論重屋奉祠亦霑於叙用久負寡聞之耻忽叨洪沛之榮

受命云初及身無所蓋此官凡經於三拜故為謝慙致於一辭豈謂提刑郎中猥賜存憐重垂褒借念歸華省謂所行之例當然喜動冲襟見相愛之情如此敢期部使深顧州僚謙固已而有之禮待人而厚矣心之所感言不能殫限領守符阻趨賓闥

謝梓州知府大監

右某伏審知府大監榮持使節出總藩條爰自下車逮茲閱月政已成於樂易頌皆播於中和九重擇人一境蒙福恭惟知府大監德由世積學有師傳性厚以通才高而敏踐揚仕籍該練政經所臨之地則民

實宜馬凡建之功則上皆信矣泌陽美績與古相參
蒲坂休聲至今爲盛惟是左川之重寔爲全蜀之雄
聊藉撫綏庶安遐遠即聞迅召別委要權某占藉提
封領麾僻郡文移冗密訊記稽違當道譏何但深心
茹儀未伸于邑子心常系於邦侯限佩守符阻趨賓
闈某無任聳慕激切之至

謝鳳州都監供奉狀

右某去國十年守蜀三郡居常渴德坐失爲書此奉
疾郵之來忽承累幅之惠過蒙存錄深負悚惶伏惟
都監供奉才辯而文性和以毅向聞註誤偶滯騫翔

真潘修於漢水猶折宏才某幸守隣疆遠依巨蔭

賴昭洒之既明當選掄之甚邇勉期善養用對優恩
瞻晤未皇企延徒切謹奉狀謝

謝西鄉西縣中舍狀

右某近被中除猥遷前列豈謂眷存之厚特形慶賀
之深感佩良多摛裁用既謹奉狀謝

謝提刑學士

右某近者伏蒙某宮特迓盛節來按偏州磴道崎嶇
春泥險滑屢涉郵亭之遠頗爲車騎之勞然幸瞻依
實虞廢弛况茲褊陋久曰因循雖自勉於剗裁但未
安於稱媿此者某官究詳所以霄抑其嚴尚相嗟憐

不賜譏責豈惟無狀獨承故舊之矜存以至群僚亦有依棲之象賴拜遠未幾系憲良深限守郡城阻趨臺府卑情無任感佩之至

謝運使按巡狀

右某近煩使斧遠按州麾簿領猥叢網條勞弛重勞檢詰悉免譏訶豈惟不肖之象休抑亦群僚之甚幸此蓋運使少鄉寬於臨下誠以接人念其間有所未周蓋於理實亦可恕使新後効與霽嚴威高軒遽還畏途正熾計神明之所佑想禔履之允佳某限守郡符阻趨賓騰其諸感深莫盡宣言謹奉狀起居兼謝

謹錄狀上

謝運使司封

右某啟近者伏承運使司封爲某發狀言於朝廷乞賜召還者無用之才本自流落不訾之舉遽辱薦揚伏念某椎縵不文孤平少與初登仕版便圖行已之見聞屢折藩符專務究民之利病頗聞治狀未至乖方用此免衆人之見譏因而獲上官之垂眷伏惟運使司封學問深博資猷敏明以忠直自信而會不他求其職任所來而皆因上選按臨本道旌別屬僚豈期樗散之頑姿亦玷袞褒之華牘益膺美之使凡先

善而必收而庸常之人宜何事而可報惟堅素節以副清言荷德非輕引詞安盡下情無任喜懼激切之至謹奉啟謝不宣謹啟

謝成都運判太博狀

右某伏審被宸宸之褒章領漕臺之副節嶠嶺之下豈獨幸提封之吏民涪江以東實大慰同黨之親友用才而當聞命皆歡依惟運判太博蚤有令名共推遠器學問淹博才謀敏明歸按新書已馳平允之譽上陳美績果委將輸之權息除初行衆望殊快何未遺於鄙撲忽先辱於音題佩服謙辭銘藏陋腑未皇

調寢與某卑情無任云云

謝真宮苑

右某嚮聞幢節之行敢用竿牘之獻以道榮幸得依美麻豈期照存忽賜還答顧此孱陋當之悚兢此蓋知府太博蚤相矜憐厚自謙抑禮鈞於下情感於中即歛迹以瞻依但盈懷而聳躍卑情無任佩荷之至

謝宋國博

伏承某官寵被宸恩榮關郡治側聞休命竊抃鄙悰將馳慶牋以謝芘覆或領珍牘何勝悚兢伏惟通判殿丞資猷敏明操履沉厚久從仁治夙著官稱嚮疇

邑課之殊茲貳藩條之重車音未及輿意相歡某幸以瑣材獲依巨蔭臨風以企與日爲深卑情無任感荷抃躍之至

謝慶州焦推官

右某伏審較能省部贊畫戎藩脩禮未皇飛文見及蒙此厚眷惕然鄙悰伏以推官秘惕儒術通明吏事強敏蚤伏士論尚淹賓筵署事云初先書以貺過相存錄深用感銘未遂瞻依所期將護謹奉狀賀無謝

謝寧州雍屯田

右某忝名鄉關幸密壤土蓋用晚末未由趨瞻常傳

伏蒙某官特枉使牙遠移公饌仰荷眷存之厚敢忘負荷之深即俟趨依併伸悃悞

伏蒙某官慰道途之勞垂肴醪之賜下霑僕乘益感肺懷

伏蒙某官遠枉使厨薦臨客傳感領重意銘藏鄙懷

謝知興元府

右某啟閏七月二十日進奏院遞到勅牒一道蒙恩就差某知興元府候成資日赴任者某鄙輸私悃上瀆公朝音驛既行實懷憂於重謫詔綸忽下果見聽於愚誠不圖嵬瑣之才薦委藩宣之任叨天若此爲

地有緣此蓋伏蒙某官稟德寬容遇物愛恕所部之
吏勿盡責其無能不才之人亦蒙休而自免所以拙
者爲郡庇之逾年曾無譴劾之聞復有薦論之重寔
由覆護致被寵靈謹當愈勵操脩庶符補塞限嬰守
綏阻謁使旌卑情云

回邛州劄駕部

近貢柔函已通燕几念封圻之咫尺承晤語以差池
仰德之深與日而永府吏至止勝音見頒荷眷錄之
殊尤增佩銘之稠沓竊惟尊履常擁神休某官游歷
榮涂皆聞懿績比殿西南之服已彰畏愛之能即竚

寵褒更膺華擢某向叨交政輒貢願言

回新知郡韓郎中漢州

伏念三泉之別一紀於茲抗俗走塵屬間關於末路
攀鱗附翼致契闊於高風屢嬰出處之煩久廢起居
之間瞻企晤語惜勞歎某官上奉宸衷遠持使節
鎮臨要部緩撫遐疇驛信先馳輿情甚愜某便安親
養佐貳藩條未皇裁書以上瀆賢明先辱賜教而俯
慰蒙陋荷眷之渥銘懷且深伏計涓時日之良整徒
御之盛然行遠道方在清秋更希偃昌之勤少護寢
興之節傾依匪遑抃蹈殊增

回綿州知郡

膺右掖之制守左綿之符已涓良辰方布善政當駐
麾於劇郡屬公檄於它州不時為書以賀視事正深
慙惓忽受謙題仰佩眷存寔銘感載某官負才敏給
稟質清淳自揚歷於仕塗悉著明於治迹邇承宣化
盛已傳謠某以賤局所拘不獲云云

回漢州四縣官

持懇聞上請官便親尋蒙詔章許倅郡事冒披貳車
之委慙當聯邑之先吏指繼來書音見屬相存者過
所示彌冲某官崇履有聞才術兼茂乃心當固其志
在民尚以吏衡之拘猶為縣道之屈匪人甚幸賢者
在茲交期有涯瞻會伊邇

回綿倅萬職方

此者猥膺宸綽叨佐郡符垂組過家誠當於素志侍
親從政尤慰於私衷竊尋忝幸之殊槩出掄揚之始
屬窘他故未輸短懷豈期眷冲先墜音訊某官曲敦
惠好高喻襟期馳伉步以及門義歸款密側微躬而
戴德心切銘藏拜賜猶賒嗇神為祝云云

新刻石室先生丹淵集第三十二卷

文同著

啟

賀延州經畧待制

右某伏審榮奉制函進陞延閣竊惟建廣內清切之地於此藏真皇制作之文厥初命官最號盛選自匪稱職寧容濫居恭以經畧待制全文武之才洞天人學嘉言謹論簡沃清衷密畫沉謀震懾醜落爰登禁近之職實副詳求之心某久荷眷存遠形抃躍未由瞻倚徒切傾瞻云云

賀運使學士

術崇通明器宇凝厚優游華貫馳騁重名忠義有先
正之風才謀當廟堂之眷嚮居諫首言聳動於本朝
今總漕權課殊尤於道左

賀成都知府資政

右某伏審換平涼之使節分右屬之戎符夷落騷邊
敢煩於我武朝廷命帥無易於公賢豈惟紓北關宵
衣之憂實以免西州塗地之患列郡仰止聞風驩然
恭惟判府安撫資政宗廟笙鏞明堂柱石高文大冊
蚤冠擢於賢科奧學淵謀久參陪於國論出入更乎
二府休戚繫於一身雖均外官常簡中眷屬坤維之

絕徼有汶嶺之孤城妖寇跳梁重擢遠俗銳兵翦撲
當委宗工即聞區處之行旋見蕩除之報西南所慮
指顧而平某假手偏州隸員屬部限嬰短紱阻拜高
牙某無任引系激切歡飲之至謹奉狀賀謹錄狀上

賀提轉冬至

右某伏以氣應黃宮灰飛緹室義經示卦復其見天
地之心呂令謹時靜以待陰陽之定賢明所獲福祿
其且伏惟運使郎中道義深淳文章粹美且爾付絲
綸之任尚茲持金穀之權行業有聞神靈是依諒乘
佳節克擁殊祥某限以官守所拘不獲詣前為壽云

賀利州知郡虞部啟洋州

右某伏審重膺堂帖榮易藩符顧惟才力之高實協
輿言之允恭以知郡虞部文章俊裔忠孝名家揚歷
仕途宣昭政績出於廊廟之論授以襟喉之邦僉言
得人誰復置議某嚮宮漢上已奉隣封今守洋中又
同當道先煩忠教過沐馮謙未遂瞻依徒深企詠云

賀正隣郡知通啟

右某伏念五始端元三朝表正陽和發歲已彰生物
之仁賢德乘辰茂集履詳之吉伏惟某官清淳稟質
寬裕凝懷自陞顯仕之塗皆著宜民之績歷夫令序
受此殊休某限寓宅藩復拘遠道不獲詣前為壽但
增祝頌之至謹奉狀賀謹錄狀上

賀冬隣郡知通運提勾啟

右某伏以七日有期一陽云復信動於內物由以生
賢德所乘福履增裕恭惟某官立誠中正抱質清淳
才大崇隆天相神佑諒涉佳辰之言必膺繁祉之休
坐遠門闌無任虔祝之至謹奉狀賀

賀正益梓提轉知府啟

右某伏以一氣遞時三陽履旦歲元肇正曆紀惟新
推德為生盡蒙於幽隱儲仁曰福先相於賢明恭惟

某官端莊敏文敦厚寬懿挺此秀時之具布為康世

之才憲欲岸攸司多有仁恕諒接資碩持金穀之確且

命即見諒接之成都府殿邦西南已著于藩諒接知

府領劍外之雄藩最書屢上諒接天之新元必受國

之重詔羣情仰祝比屋同辭某限守遠官阻臨高屏

其諸頌詠但此傾翹

賀興元府通判禮上啟

右某伏審攷擇剛辰揭臨美任恭惟慶慰伏以通判

秘丞東南秀氣詩禮名家參郡務於蓬山已彰善績

貳藩條於漢水猶抑宏才某幸守隣疆遠依巨蔭限

嬰組紱阻造階除卑情無任喜抃之至

賀提轉知倅

某啟元正令序伏惟某官乘此三陽之候倍迎百福

之休某限以守符不獲詣左右為賀下情但深祝頌

之至云云

賀蓬州楊簽判

某接鸞鵠之羣昔預九霄之侶造鸞鴻之列今同一

道之官至此歷年自知斂倦役於多事殊失音題遽

蒙啟訊之先悅發愧尤之甚敦隆契好度越儕流無

似當之不遑深矣某官同年才猷敏邵文藻道華四

丹淵集

卷二十二

三

世三公遠襲慶源之大一日千里早聞令譽之馳著
籍朝閨僉謀郡幕方在急賢之會即膺舉德之求某
限守藩符阻趨賓闥云

賀東川知府朱少卿

伏承顯拜恩章出臨藩鎮涓辰布治與衆更新伏惟
慶慰恭以某官德重行方識周才貫聳朝倫之風望
練政理之本原棘位辨名中參九列之峻竹符分寄
外殿一方之雄遲舉化條散爲民福某叨從別乘竊
迹隣邦惟是先廬得依大庇屬居官之有制顧授謁
以無階瞻引旌麾機搖魂幹云云

賀利州王郎中狀

方某近蒙高旌前過敝邑迎候之禮一愧空無睽遠
以來久失裁謝此者伏審榮臨會府盛布寬條吏民
歡呼通路傳播恭惟某官學有本末政知後先比郡
聲稱游揚正甚外臺薦辟施設尤殊卽聞美課之陸
行有褒息之及某限紆守紱阻集賓階引領崇闕云

賀提刑司勳狀漢中

右某伏審被明廷之詔旨按當道之刑書佳音布聞
羣論欣愜惟是中梁之舊域曾經太守之行春里巷
相驩吏民胥慶矧茲蒙顧之舊益用抃懷之深伏惟

某官博學精醇負才敏給持誠恕厚泣事通詳藉大
正信之才委以平亭之職提封之下治解所存某嚮
詣賓階接辭已幸今居使部承教當先日佇郵音前
臨馬首卑情無任云

賀巴州知郡郎中狀

右某伏審宸綸就紉郡組褰帷入境撫凡臨民
嚮輟藩條來參漕柄殊尤之績已當考最之書顯要
之涂即應陟明之典云

賀提刑度支轉官啟

右某伏審提刑度支榮膺顯制寵進名曹凡託按臨

之休舉增慶抃之劇矧蒙厚眷實倍常情恭惟某官
器業自將風力蕪茂充中以道炳外其文蚤在妙齡
已著翹然之譽薦躋臚仕衆推卓爾之才上心東來
衆論諧愜右川重委方倚屬於讞疑左省哀遷復延
登於主計用雖未既思蓋非常即聞奏課之尤當有
任能之召某幸棲美蔭良動懽懷所限佩守符之微
無由趨使節之下引領臺府云

賀趙龍圖上任啟

伏審某官涓選良辰視臨美政居庥者衆竊幸焉深
恭惟某官道貫二儀才周萬變高猷映世亮節端朝

會遇聖神之知躋陞侍從之列蜀所巨鎮益云要藩
上歆用公詔煩爲守鼎席如缺玩印而有求鋒車下
臨趨節而先起前是數相一新稚耄之瞻大布慈和
之政隣城仰式宅道胥傳伏惟某官資稟端淳才猷
敏邵仕榮揚歷官最殊尤嚮題漢水之輿佳聲未泯
今剖巴江之竹善譽先馳方裂素以通誠忽憑郵而
賜教眷存所厚佩服良深

賀洪雅知縣陳秘丞狀

右某徃年南岐榮治之下獲誦雄編去歲東蜀旅郵
之中復傾高論心常景伏迹但睽乖而况處鄉關甚

密之隣預榜籍同井之契故當無遂廢之書簡所恨
有相違之宦途向者抗牘而屢請小麾幸此蒙恩而
歸守支郡遽承占問之及良荷記存之深某官同年
文章高於衆人誼行比於前輩治一同之地難乎盡
展驥之才居四徹之山宜矣任和鉉之職即聞美召
行踐華途未遑奉左右以周旋實亦望東南而旋倚
願勤善養俯慰虔祈何用瞻依用寃悃幅

賀運判都官啟

盛世雄英華門嗣慶蚤奮深湛之學亟深高妙皆從
此塗某茲處未僚自慙冗器日期大用願託巧陶所

限繫題輿之微無由伏齋几之下云

賀正東川朱少卿

一氣遍時三陽履旦歲元肇正曆紀惟新推德爲生
盡蒙於幽隱諸仁曰福先相於賢明恭惟某官端莊
敏文敦愿寬懿挺此秀時之具布爲康世之才猷行
攸司多存仁恕神明所佑卽俾休祥諒接天之新元
必擁國之厚寵群情仰祝比屋同辭某限守遠官阻
臨高屏其諸頌詠但比傾翹

賀懷安知軍轉官

伏審近蒙均恩榮進中秩伏惟慰慶恭以某官挺質

高爽持才敏明稟規賢門登仕聖世尚屈臨於遠國
卽召置於華途此而榮遷漸以要用某幸隣善部阻
拜崇墉春輝正深道味益勝云

回漢州郎中

近奉宸俞就遷州寄遽然拜命惕若兢懷某迥蒙朝
廷假守仁壽謂僻陋至微之郡宜迂踈不肖之人逮
至此時云爲多故文移全集事目交紛行雖躬親處
實迷誤無偃仰棲遲之暇有喧囂仇怨之煩已幸報
成猶虞罪去念將滿歲當趣還朝轉徙有道涂之憂
徧反餘昏嫁之累敢持愚懇游扣嚴聰奏牘既行祗

虞於重譴詔綸忽下尋被於鴻恩以李固解綬之鄉
爲阮咸出麾之地來雖有自淁豈無緣某官素與鄉
評陰加士論常見匿瑕之美曲揚剖垢之光遂使孱
庸獲叨除委更煩慶問之賜益荷朋遊之深紬味妍
詞銘藏陋腑未皇展晤徒切翹凝

回漢州知郡

伏審近奉宸綸再留使節藉乃厚德慰諸羣心豈惟
增閭里之光抑亦重朋遊之喜某官託姿粹茂賦量
淹宏以儒學踐巍科以吏事陞峻秩還鄉爲郡布政
宜人是故河內父老願借於寇恂淮平吏民爭乞於
侯霸九重是與千里相歡方議馳書忽蒙賜誨仰承
眷錄深負感藏

新刻石室先生丹淵集第三十三卷

文同著

先狀

成都新尹趙龍圖先狀

伏審某官進登延閣之華出守右川之重蒙休者衆
竊幸焉深恭惟某官性稟道冲體茲坤直端方勁潔
博裕寬闊究學淵淳成文雅健事親以孝而行聳羣
俗納已於道而名高當時優游仕榮增衍賢美嚮自
亨衢振采禁路升華奉白簡以繩愆朝倫以肅伏青
蒲而納誨帝念其嘉以至總金幣佐會省之繁調芻
糗贍朔陞之給皆凝茂績實稔休聲蜀為遠邦邑曰

巨鎮其政繫於國體所寄維於上心地望素隆事權
時重將委任於守土實艱難於擇人付畀或差經營
且力會此及瓜之代久煩玩印之求作牧以行非公
其可是用褒陞適職慰寵遊民已聞高牙漸出危棧
木牛舊地重識孔明竹馬前人再迎郭伋其傾依有
素汨沒無庸忝佐偏州幸當洪蔭歡欣踴躍倍萬于他

漢牧先狀

某自遠標符僅周歲序瞻懷靡極歧引為勞顧惟書
問之踈實繫事為之冗側承興止舉集嘉休此者某
營祿養親列情于上尋膺宸檢獲貳藩條得遂依仁

豈勝為幸已計出都之日即聞赴治之期瞻拜有涯
欣歛是切

成都韓端明先狀

某近奉恩除幸叨職委顧惟支郡託在洪庥拜命之
初撫躬以扑某嚮終親制屢抗愚衷所聽云高斯誠
未允某官内存愛恕深軫孤平謂宜還官使得就養
猥蒙奏列盡道哀窮今此陶甄實由薦藉已戒出都
之日即諧趨府之期將侍崇嚴併陳悃幅

漕憲先狀

此者某拜恩天朝守職鄉郡侍親以便撫已為崇某

嚮起憂廬召還秘館常念慈闈之養屢祈嚴宸之私
愚悃盡傾聖心下側許歸舊里得佐偏州顧茲職守
之微獲在按臨之下惟天與幸有地庇身已戒輕裝
即趨賤局瞻依甚邇喜并無涯

運使蘇刑部先狀

伏審某官榮服命書移領使節提封舊俗參語以交
歡屬部下僚撫躬而自慶竊承行府已涉近疆偃冒
勤劬起居休豫恭惟某官探道奧秘崇文精深藏以
在身施之行事用無不効績故常尤按三尺之書了
無冤議調九年之食頻倚辦才所至也人皆賴之其

功焉上實知矣猶煩遠使將漸邇臣且蜀號財賦之
饒於國當調度之半有藉供億必繫強明智敏所臨
課力惟最兼以重柄委之外臺民之利害得以興除
吏之善惡因而懲勸高車在道列部傾風某奉親還
鄉倅職屬郡比授按司之檄此讐利局之符有幸孱
涼得依庇護即趨近甸引拜旅旌

運使度支先狀梓州

竊伏下風講聞高誼自爲晚輩未嘗獲對於晤言徒
仰盛名不敢輒通於音問此者伏審某官以才能之
重受神聖之知蜀有兩川梓爲一道財賦之行常供

邊場之求郡邑之繁須慰吏民之望孰膺上眷僉謂
老成高車未來列部相慶某庇族下邑居官鄰城企
漕節之華願瞻風而實切守倅車之賤顧通謁以無
由聊導懇誠少塵几格云

提刑宋郎中先狀

伏審某官更麾南幽按憲西蜀邸訊初諭輿情已驩
蓋重名之久馳且遠人之甚慰恭惟某官器略宏遠
材資粹方蚤歷榮途盛著徽節科條易避參脩三尺
之書飛輓均輸佐調九年之食休有不績簡于上心
此者出爲外臺專按一
道中典之重方委平亭列部

至繁盡歸廉糾此之要劇宜以通明某昔在上都幸
觀高誼今居支郡獲庇洪庥聞命之初抃懷增劇云

李殿丞權交代先狀

嚮由貴治嘗挹高風遠闊踰時候問無所此者某叨
膺宸檢分守郡條矧漕臺之借才屈明府而承乏獲
交善矩且慰愚衷未遑馳書先辱賜教仰佩推褒之
重實懷悚愧之深即遂披瞻預增喜躍

湖州提轉先狀

將赴湖州

忝膺宸綽薦昇藩條顧惟無似之姿謬此惟良之寄
撫衷自省竊幸焉深伏念某單涼遠人漂泊孤宦賦

命譴薄與時閣踈故常守於外官輒屢更於數郡雖
後殊尤之効僅逃殿劣之譏三館既還豈涓埃之云
補一麾重請得江海之于宣此者伏遇某官被眷九
重理財一道布惟新之政惠養民昨按所部之城澄
清寮吏秉剛方之節威惠風行持察舉之權否臧洞
照幸將蹇跡仰記殊休某已謀便道之行即次提封
之下有期贍倚無量於歛

丹淵集三十三卷終

卷之三